

Protocol no. 18
Sezzüda da lündeschdi, 7 mai 2012 – 20.00 – 22.30

Preschaints: Albert Mayer, Andri Poo, Men Caviezel, Dumeng Jann,
Marianne Werro-Lehmann e Claudia Luppi (protocol)

Protocol

Il protocol no. 17 da la sezzüda dals marcurdi, 2 mai 2012 vain approvà.

123 02 ADMINISTRAZIUN
Publicaziun dal protocol da radunanza sülla pagina d'internet

Per la publicaziun da protocols nun es avantmant in Grischun üna basa legala chantunala. Quista dumonda sto gnir reglada comunalmang. In connex culla revisiun da nossa constituziun cumünala es gnü adattà l'art. 19 al. 2 cul seguaint passus: *“Ils protocols da la radunanza cumünala pon gnir publichats eir cun mezs electronics sco p. ex. l'internet. Datas da persuna ston in quist cas gnir anonimizadas.”* Il Cussagl cumünal decida da publicar eir in avegnir ils protocols da radunanza sülla pagina d'internet in resguardond il fat cha las datas da persunas ston gnir anonimizadas.

124 021 FABRICA
Pratcha a regard permiss da fabrica per 2.abitaziuns pel 2012

Tenor las directivas da l'uffizi per il svilup dal territori dal Grischun pon ils cumüns da princip conceder fin als 31 december 2012 ün permiss da fabrica per fabricats chi vegnan dovrats sco abitaziuns secundaras. Tenor l'uffizi nun esa necessari d'intergrar in quels permiss da fabrica ün passus chi muossa via sün eventuals müdamaints illa procedura dals permiss da fabrica causa l'acceptanza da l'iniziativa chi limitescha la quota d'abitaziuns secundaras a maximal 20%.

Il Cussagl cumünal discuta la tematica e decida da proseguir pel 2012 seguaintamaing:

- Permiss da fabrica vegnan concess sco fin uossa tenor la ledscha da fabrica cumünala in resguardond las restricziuns chi concernan la zona da planisaziun.
- Prolungaziuns per permiss fingià concess vegnan dattas tenor las prescripziuns da la ledscha da fabrica cumünala.
- Pro'l permiss da fabrica vain integrà ün passus a regard il scumond da fabricar seguondas abitaziuns tenor l'iniziativa acceptada.

125 700 PROVEDIMAIN D'AUA
Manisaziun da pumpas i'ls reservuars – credit fr. 20'288.--

Las pumpas i'ls reservuars han fat blers ons lur serv e sun uossa in ün stadi chi nu funcziunan plü adüna tenor la sgürezza ed il standard pretais hozindi. Perquai ha il schef dal provedimaint d'aua tut aint offerta per far adattamaints vi da las pumpas sco eir per installar indrizzs per masüraziuns d'aua cun ün sistem da transmissiun da datas. In vista cha'l provedimaint d'aua es ün sector sensibel per ün cumün chi sto funcziunar a satisfacziun decida il Cussagl cumünal da conceder il credit da fr. 22'288.-- tenor l'offerta.

126 860.315.04 Spaisas implant electric Sur En
Generatur nouv e revisiun implant electric – credit fr. 14'000.--

Dal 1989 es gnüda fatta l'ultima revisiun dal generatur da l'implant electric a Sur En. Uossa s'ha stuvü constattar ch'üna revisiun dal generatur es difficila causa chi nu's chatta bod gnanca plü ils tocs correspondents per quist model. Tenor offerta cuosta ün generatur nouv fr. 7'000.--. Pel transport dal generatur esa da calcular cun fr. 1'000.--. Implü vegnan pro amo cuosts da revisiun generals e cuosts per fabricar aint il generatur, uschè ch'id es da calcular cun cuosts totals da raduond fr. 14'000.--. Il Cussagl cumünal decida da conceder il credit da fr. 14'000.-- pel generatur nouv e las lavurs correspondentas in quel connex.

127 720.434.02 Deponia La Fuorcha
Allontanar aldüm

Dürant i'ls ultims ons esa adüna darcheu gnü deponà aldüm sül plazzal sura e suot pro la deponia La Fuorcha. Il schef da deponias vuless rumir ils aldümers definitiv per s-chaffir uschè ün plazzal per s-chargiar e chargiar la laina. Il Cussagl cumünal decida da far quista rumida e da nu conceder plü permiss per depositar aldüm sün terrain public in quel lö.

128 622 GRUPPA DA MANTEGNIMAIN
Reclamaziuns in connex cun ün impiegà

Causa chi aintran repetidamaing reclamaziuns in connex cun ün impiegà da la grupp da mantegnimaint e ch'eir ils schefs ed ils manaders da la grupp han adüna darcheu motiv per til admonir decida il Cussagl cumünal da convochar üna sezzüda cul capo, culs duos cusgliers respunsabels e culs manaders da las gruppas dal cumün Mario Riatsch e Jon-Curdin Felix a la quala vain clomà eir l'impiegà pertoc.

129 ORIENTAZIUNS

Di da movimaint

Davo cha'l prüm di da movimaint es stat ün success vuless la scheffa da promoziun da sport organisar ün ulteriur di da movimaint chi dess darcheu intimar a la gliעד d'as mover regularmaing e da preferir ün nudrimaint plü san. Il datum da quist di es previs in sonda ils 23 gün opür in dumengia ils 24 gün 2012.

Stabilimaint da la Posta

Il capo orientescha cha sar Löffel da la Post Immobilien haja comunicà ch'els hajan fat far üna nouva stima dal stabilimaint da la Posta a Sent e cha quella stima saja dafatta per raduond fr. 93'000.-- plü ota sco la stima chi d'eira fin uossa indicativa pel predscha da cumprita da fr. 1 mio.

L'actuara: